

Uunga siunnersuut: Sulisitsisut aamma atorfillit akornanni inatsisitigut pissutsit pillugit Inatsisartut inatsisaat nr. xx af xx.xx. 2013-imeersoq.

(Aningaasaqarnermut Nunamullu Namminermt Naalakkersuisoq)

Saqqummiussissut**Siullermeerneqarnera**

Naalakkersuisut sinnerlugit matumuuna atorfillit pillugit inatsisissatut siunnersuut maani pissutsit aallaavigalugit suliarineqartoq saqqummiutissavara. Sulisitsisut atorfillillu akornanni inatsisitigut pissutsit pillugit maannamut nunatsinni inatsiseqarsimanngilaq. 2008-mi ukiakut katersuunnermi immikkoortoq 55-ip akuersissutigineqarneratigut Inatsisartut aalajangiipput pissutsit taamaannerat aaqqiivigineqartariaqartoq.

Taamaammat Naalakkersuisut siunnersuut pineqartoq suliaraat, taamaalilluni isumaqatigiissutit malillugit sulisut sulisullu tjenestemandinut assingusumik atugassaqartitaasut inatsisitigut naammattumik illersorneqarsinnaalerniassammata. Taamaammat Kalaallit Nunaanni atorfillit pillugit inatsisip atuutilersinneqarnera ulluinnarni allanngornernik annertuunik nassataqarnaviangilaq. Tamatumali kingunerissavaa inatsisitigut tunngavissat nalorninartuerunnerat, tamakkumi atorfilinnut tamanut assigiilersussaammata.

Taamaaliornissamut piffissanngorpoq inuiaqatigiit atugarissaartut annertuumik iluarsaaqqiffiusussanngormata. Ukiuni aggersuni utoqqaat amerliartorneri ilutigalugit minnerunngitsumik pisortat suliassa qarfiini naleqqussarnissamut naammassisaqarsinnaanerulernissamillu piumasagaatit annertusiartussapput. Taamatut piumasagaateqartoqalissaaq kikkut naalakkersuisuuneri apeqqutaatinnagu. Taamaammat pingaaruteqarpoq sulisut pitsaasunik inatsisitigut inissisimalernissaat. Naammangilaq danskit inatsisaanni aalajangersakkat innersuussutigiiinnartassallugit.

Siunnersuut taanna Inatsisartut akuersissutigissappassuk pisortat suliassa qarfi siunissami unammilligassaqaqisut nukittuallatseqqissavagut. Aqqutissarput takeqaaq kisiannili ataatsimoorluta annertuunik annikitsunnguanillu ingerlariaqqittassaagut.

Neriuppunga Inatsisartut siunnersuut illassilluarumaaraat.